

MODERNIZACIJA STUDIJSKOG PROGRAMA U FOKUSU EKONOMSKOG FAKULTETA BRČKO



Ekonomski fakultet u Brčkom danas je zvanično krenuo sa promocijom aktivnosti fakulteta, s ciljem animiranja srednjoškolaca za upis u ovu visokoškolsku ustanovu. S tim u vezi planirali su niz aktivnosti na tom polju.

Uz Zakon o visokom obrazovanju, koji je nedavno dobio zeleno svjetlo brčanske izvršne vlasti, iz Ekonomskog fakulteta smatraju da će stanje u visokom obrazovanju biti mnogo kvalitetnije uređeno.

“Ovo je motiv više da mnoge aktivnosti, koje su do sada bile ne čekanju na području Brčko distrikta, budu otkočene. Ako smo do sada bili servis privrednog razvoja Brčko distrikta, vjerujem da ćemo kroz ovaj zakon u budućnosti biti u još većoj mjeri. Radovat ćemo se ako Odjeljenje za obrazovanje krene u proces ulaganja u infrastrukturu za visoko obrazovanje. Taj razvoj, što se tiče javnog fakulteta, će donijeti višestruke koristi” rekao je Srđan Lalić, dekan Ekonomskog fakulteta Brčko.

Prioritet Ekonomskog fakulteta u Brčkom je modernizacija studijskog programa, te usaglašavanje sa potrebama tržišta rada zahtjevima poslodavaca vezanih za znanje, vještine i kompetencije koje studenti ovog fakulteta treba da imaju.

“Osnova modernizacije će biti istraživanje potreba tržišta rada u Brčko distriktu, koje će nam dati detaljne informacije o tome koji su profili zanimanja potrebni u sadašnjem vremenu i šta poslodavci zaista traže u smislu tzv. lakih vještina” rekla je Renata Lučić, prodekan za nastavu na Ekonomskom fakultetu Brčko.

Inače, Ekonomski fakultet u Brčkom opredijeljen je i za međunarodnu razmjenu studenata. Dekan ovog fakulteta ističe da uspijevaju studentima obezbijediti takav vid nastave, prolazak obuke i prakse na drugim univerzitetima. Pored fakulteta sa prostora bivše Jugoslavije obezbijeden je odlazak jednog studenta na Univerzitet Voronjež u Rusiji, dok istovremeno njihova dva studenta stižu u BiH. Namjera je, kaže dekan Lalić, da razmjena studenata bude proširena i na Tursku.